

**Shaitānī Tāqaton se  
Kaise Bachūn?**



*shaitānī tāqaton se kaise bachūn?*

Freedom From Occult Forces

by Bakhtullah

[Ao, Khud Dekh Lo 25]

(Urdu—Roman script)

© 2024 www.chashmamedia.org

*published and printed by*

Good Word, New Delhi

The title cover is derived from Bucarama-TLM  
<https://pixabay.com/illustrations/maundy-thursday-holy-thursday-7870823/>.

Bible quotations are from UGV.

*for enquiries or to request more copies:*

askandanswer786@gmail.com

## **Fahrist**

|  |           |
|--|-----------|
| <b>Mujh se Pāk-Sāf Ho Jāo</b>                      | <b>4</b>  |
| <b>Rozānā Pāk-Sāf Ho Jāo</b>                       | <b>10</b> |
| <b>Merī Kḥādimānā Rūh Apnāo</b>                    | <b>13</b> |
| <b>Shaitānī Tāqatoñ se Merī Hifāzat Qabūl Karo</b> | <b>16</b> |
| <b>Injīl, Yūhannā 13:1-30</b>                      | <b>18</b> |

- ▶ *Ham shaitānī tāqaton se kis tarah nipaṭ sakte haiñ?*

Har ek kā apnā hī tarīqā hotā hai. Aksar tāwīz rakhte haiñ. Bahut log pīr ke pās jāte haiñ. Anginat aur tarīqe bhī dekhne meñ āte haiñ.

- ▶ *Itne tarīqe kyon hote haiñ?*

Islie ki ham sab ko shaitānī tāqaton kā tajribā huā kartā hai. Kisī kī burī nazar lag jātī hai. Yā kāle jādū se koī hādasā hotā hai. Kabhī sapnon meñ, kabhī jāgte waqt shaitānī tāqateñ hamāre palle paṛtī rahtī haiñ. Lekin in ke qābū meñ rahne kī zarūrat nahīñ hai. Injil Sharīf hameñ in se bachne kā hal batātī hai.

- ▶ *Injil Sharīf hameñ in se bachne kā kyā hal batātī hai?*

Āie ham Yūhannā kī Injīl meñ pesh kie gae hal par ġhaur karen. Fasah kī Īd shurū hone wālī thī. Īsā Masīh jāntā thā ki thoṛī der bād mujhe is duniyā ko chhoṛkar bāp ke pās wāpas jānā hai.

► *Īsā Masīh ko kis tarah Ḳhudā bāp ke pās jānā thā?*  
Salībī maut ke rāste se.

Din ḡhalne lagā to shām kā khānā taiyār huā. Khāne meñ Yahūdāh bhī sharīk thā, wuhī jo use dushman ke hawāle karegā. Īsā Masīh ko bahut dukh ho rahā thā kyonki wuh yih jāntā thā. Lekin wuh yih bhī jāntā thā ki merī salībī maut zarūrī hai. Sāth sāth wuh mahsūs kar rahā thā ki ab waqt ā gayā hai ki main apne shāgirdoñ ko ek bahut ahm sabaq sikhāūñ. Us ne dastarḡhān se uṭhkar apnā libās utār diyā aur kamr par tauliyā bāndh liyā. Phir bāsan meñ pānī ḡālkar wuh shāgirdoñ ke pāñw bārī bārī dho dhokar tauliyā se ḡhushk karne lagā. Shāgird dang rah gae.

► *Wuh kyon dang rah gae? Kyā pāñw dhonā ām-sā kām nahīn thā?*

Zarūr. Qadīm zamāne ke aksar rāste pakke nahīn the. Wuh dhūl aur kīchaṛ se bhare rahte the. Ām log yā nange pānw yā chamṛe ke chappal pahne safr karte the. Zāhir hai ki rozānā apne pānwon ko dhonā partā thā. Waise bhī is ḳhās mauqe par zarūrī thā ki sab apne pānw dho leñ.

► *To phir shāgird kyon dang rah gae?*

Islie ki un kā ustād yih kām kar rahā thā.

► *Yih kyon hairānī kī bāt thī?*

Aisā kām bahut gandā samjhā jātā thā. Ām taur par shāyad hī koī ḡhulām yā laundī dūsron ke pānw dhotī thī.

Islie jab ustād ne apnā libās utārkar kamr par tauliyā bāndh liyā to tamām shāgird but ban gae. Patras kī bārī āī to us ne kahā, “Ḳhudāwand, āp mere pānw dhonā chāhte haiñ?”

Īsā Masīh ne jawāb diyā, “Is waqt tū nahīn samajhtā ki main kyā kar rahā hūñ, lekin bād meñ yih terī samajh meñ ā jāegā.”

Patras bolā, “Main kabhī bhī āpko mere pānw dhone nahīn dūngā!”

► *Patras apne etarāz se kyā kahnā chāhtā hai?*

- Pahle, yih sharm kī bāt hai ki āp hamāre pānw dho rahe haiñ.
- Dūsre, ai ustād, āp yih kyoñ kar rahe haiñ? Ham to āpke agent, āpke wazīr haiñ. Ham hī behtar jānte haiñ ki āpko kyā karnā hai. Bas ham par sārā māmālā chhoṛ do.

► *Kyā āp aise log jānte haiñ jo apne āpko Ḳhudā ke agent samajhte haiñ?*

Lekin Īsā Masīh kī soch hamārī soch se bahut farq hai. Us ne kyā jawāb diyā? Jawāb yih diyā ki

### **Mujh se Pāk-Sāf Ho Jāo**

Us ne farmāyā, “Agar main tujhe na dhoūñ to mere sāth terā koī hissā nahīn hogā.”

► *Iskā kyā matlab hai?*

Zarūrī hai ki main hī tujhe dhoūñ. Merā yih kām qabūl karo tab hī terā mere sāth hissā hogā.

- ▶ *Masīh ke sāth hissā hone kā kyā matlab hai?*  
 Jab merā Masīh ke sāth hissā hai to main us ke ghar kā hūñ, us ke ghar wāloñ meñ se hūñ.
- ▶ *Uskā ghar kahāñ hai?*  
 Ẹhudā ke pās. Jannat kah leñ yā āsmān.
- ▶ *Kyā ham apnī koshishoñ se us ke ghar wāle ban sakte haiñ?*  
 Kabhī bhī nahīñ. Lāzim hai ki ham pahle apne gunāhoñ se pāk-sāf hokar shaitānī tāqatoñ se āzād ho jāeñ.
- ▶ *Dhone se Īsā Masīh apne ek Ẹhās kām kī taraf ishārā kar rahā thā. Wuh kyā hai?*  
 Wuh apnī salībī maut kī taraf ishārā kar rahā thā.
- ▶ *Salībī maut kyon dhone kī tarah hai?*  
 Uskī salībī maut hameñ gunāhoñ kī gand se dhokar shaitānī tāqatoñ se chhurā detī hai.
- ▶ *Salībī maut kā rāstā kyon zarūrī thā?*  
 Ham apne nek kāmōñ se Ẹhudā ko manwā nahīñ sakte ki wuh hameñ jahannum se chhūṭ



de. Koī bhī insān dāwā nahīn kar saktā ki us ne apne nek kāmōn se apne bure kāmōn ko ḍhānp diyā hai.

► *Wuh kyōn yih dāwā nahīn kar saktā?*

Islie ki hamāre tamām nek kām nākāfī haiñ. Hamāre bure kāmōn kī gand ham se liptī rahtī hai aur inhīn kī wajah se ham shaitānī tāqatoñ se ghere rahte haiñ. Jis tarah makkhiyāñ galesaṛe khāne ke irdgird bhibhinātī rahtī haiñ, usī tarah shaitānī tāqateñ hamāre bure kāmōn ke bāis hamāre irdgird bhibhinātī rahtī haiñ. Jab tak yih gand dūr na ho jāe koī sahārā nahīn hai. Kisī laṛke kā zikr hai jo dhyān na dekar khule gutter meñ gir gayā. Shukr hai ki bach gayā. Magar jab niklā to uskī hālat qābil-e-rahm thī. Pūrā badan gande pānī se kālā thā, aur badbū chāron taraf phail gai.

► *Pahlā kām kyā thā, jo us ne kiyā?*

Us ne achchhī tarah nahā liyā.

- *Kyā yih kāfī na hotā agar wuh nahāne ke bajāe apne ūpar ḡhushbū chhīraktā?*

Kabhī nahīn. ḡhushbū chhīrakne se gand dūr nahīn hotī. Bahut imkān bhī hotā ki wuh bīmār par jātā. Yahī hamārī ḡhudā ke sāmne hālat hai. Ham apne nek kāmoñ kī ḡhushbū se wuh gand dūr nahīn kar sakte jo hamāre bure kāmoñ se ham se latpat ho gaī hai. ḡhushbū ke bāwujūd yih badbū rahtī hai. ḡhushbū ke bāwujūd shaitānī tāqateñ hameñ ghete rakhtī haiñ. Pahle nahāne kī zarūrat hai, pāk-sāf ho jāne kī zarūrat hai. Tab hī ḡhushbū ṡhīk kām karegī. Tab hī shaitānī tāqateñ hameñ chhor jāeñgī.

Islie Īsā Masīh is duniyā meñ utar āyā. Us ne wuh kām kiyā jo ham na kar pāe. Sirf uskā yih kām hameñ dhokar hamāre bure kāmoñ kī gand dūr kar saktā hai. Us se hamāre gunāh na sirf māf ho jāte haiñ. Unheñ miṡāyā bhī jātā hai.

- *Wuh kis tarah miṡāe jāte haiñ?*

Is se ki Īsā Masīh ne salīb par hamāre gunāhoñ kī sazā uṭhā lī hai. Jyoñ hī ham us par īmān lāte haiñ hamāre gunāh miṭ jāte haiñ, ham Ḳhudā ke sāmne pāk-sāf hokar shaitānī tāqatoñ se āzād ho jāte haiñ.

Kabhī kabhī jab gutter band ho jāe to kisī ādmī ko gutter ke pānī meñ utarkar use kholnā paṛtā hai. Dekho, Īsā Masīh us jaisā ādmī hai. Wuh jo nūr hai, jo sarāsar pāk hai is duniyā ke gande gutter meñ utar āyā tāki hamāre bure kāmoñ kī gand dūr karke hameñ shaitānī tāqatoñ se bachāe.

- ▶ *Kyā āpne dhone kā yih kām qabūl kar liyā hai?*  
Aisā kām sirf wuh kar saktā hai jo sarāsar nūr, sarāsar pāk hai.
- ▶ *Chhoṭe bachche kī misāl lo. Kyā chhoṭā bachchā apne pāñwoñ par kharā ho saktā hai?*  
Nahīñ. Chhoṭā bachchā apne māñ-bāp kā ek kām bhī nahīñ kar saktā. Māñ-bāp paise kamāte, uskī dekh-bhāl karte, use khānā

khilāte, use nahāte haiñ. Yahī ẖhudā ke sāmne hamārā hāl hai.

► *Ham ẖhudā ke sāmne kis tarah bachche jaise hote haiñ?*

Ham apne āpko chhuṛā nahīn sakte. Yahī bāt Īsā Masīh Patras ko batānā chāhtā thā: Tū najāt kā yih kām nahīn kar saktā. Chhoṭe bachche kī tarah apne hāth merī taraf phailā de tāki maiñ tujhe dho dūñ, tujhe apnī god meñ lekar shaitānī tāqatoñ se bachāe rakhūñ.

Īsā Masīh ke sāmne yahī hamārī hālat hai. Duniyā meñ ham na us ke numāinde na us ke wazīr haiñ. Ham sirf us ke qarzdār haiñ. Kyonki usī ne sab kuchh hamārī ẖhātir kiyā hai. Ham apnī najāt ke lie kuchh nahīn kar sakte. Na nek kām na hadiye hameñ najāt dilā sakte haiñ. ẖhudā ke sāmne na ham kisī aur par ilzām lagā sakte haiñ na koī taqāzā kar sakte haiñ. Us ke sāmne ham sab gunāhgār hī haiñ. Islie hameñ uskī zarūrat hai jis ne hamārī jagah hamārī sazā bardāsht kī.

- *Kyā āpne Īsā Masīh kā pāk-sāf karne wālā kām qabūl kiyā hai?*

Patras jaisā mat bano. Us ne sochā, mujh se hī dhone kā kām ho jāegā. Main hī āpke lie laṛūngā. Mujhe āpkī madad kī kyā zarūrat hai? Āpko to merī hī madad kī zarūrat hai.

- *Kyā āp Patras kī tarah sochte haiñ ki mujh se sab kuchh ho jāegā? Yā kyā āpne apnī zindagī Masīh ke supurd kī hai?*

Apnī koshishoñ ko chhoṛ do. Apne āp par bharosā mat karo. Sirf us par pūrā bharosā karne se āp shaitānī tāqatoñ se bach jāenge. Sirf us par etamād karne se āp adālat ke din bach jāenge.

Lekin Īsā Masīh ek aur bāt bhī batānā chāhtā hai. Yih ki

### **Rozānā Pāk-Sāf Ho Jāo**

- *Jab Īsā Masīh ne farmāyā ki main hī pāk-sāf karne kā yih kām kar saktā hūñ to Patras ne kyā jawāb diyā?*

Wuh bolā, “To phir Ḳhudāwand, na sirf mere pānwoñ balki mere hāthoñ aur sar ko bhī dhoen!”

► *Kyā āpne kuchh mahsūs kiyā?*

Patras ab tak ustād ko batānā chāhtā thā ki use kyā karnā hai.

► *Tab Īsā Masīh ne kyā jawāb diyā?*

Jis shaḳhs ne nahā liyā hai use sirf apne pānwoñ ko dhone kī zarūrat hotī hai, kyoñki wuh pūre taur par pāk-sāf hai. Tum pāk-sāf ho, lekin sab ke sab nahīn. (Yūhannā 13:10)

► *Iskā kyā matlab hai? Kyā wajah hai ki sirf apne pānwoñ ko dhone kī zarūrat hotī hai?*

Is meñ do bāteñ juḡī huī haiñ:

- Īmān lāne se ham uskī salībī maut se ek bār sadā ke lie pāk-sāf ho jāte haiñ. Is se hameñ najāt yaqīnī hai.
- Phir bhī rozānā is kī zarūrat hai ki ham us ke huzūr ākar us se pāk-sāf kie jāen. Jab tak ham

duniyā kī gandī galiyon̄ meñ phirte chaleñge tab tak hamāre pāñw bār bār dhūl aur kīchar se latpat ho jāeñge, tab tak ham se ġhalatiyāñ hotī raheñgī. Islie zarūrī hai ki ham rozānā us se minnat kareñ ki wuh hamāre pāñwoñ ko dhoe. Warnā ḡhatrā hai ki ham āhistā āhistā dubārā shaitānī tāqatoñ kī zad meñ ā jāeñ.

Mere dost, Patras jaise mat bano. Īsā Masīh ko mat batānā ki use kyā karnā hai. Chup raho aur use takte raho. Usī kī āwāz sunte raho. Qabūl karo ki wuhī āpko rozānā pāk-sāf kar saktā hai. Wuhī āpko rozānā shaitānī tāqatoñ se mahfūz rakh saktā hai.

► *Lekin Īsā Masīh kā kyā matlab thā ki sab ke sab pāk-sāf nahīñ haiñ?*

Yahūdāh Iskariyotī pāk-sāf nahīñ thā.

► *Is se ham kyā natījā nikāl sakte haiñ?*

Anginat log Īsā Masīh ke shāgird kahlāte haiñ lekin jhūṭhe shāgird haiñ. Yahūdāh in meñ se

ek thā. Wuh pāk-sāf nahīn ho saktā thā. Wuh shaitānī tāqaton se bach nahīn saktā thā.

► *Kyon?*

Us ke dil ne Īsā Masīh ko rad kiyā thā. Apnī salībī maut se Īsā Masīh ne hamen pāk-sāf karne kā kām saranjām diyā. Lekin sirf wuh najāt pātā hai jo uskā yih kām qabūl kartā hai.

► *Kyā āpne Masīh kī yih najāt qabūl kī hai?*

Tab Īsā Masīh ne ek tīsri bāt farmāi. Yih ki

### **Merī Ḳhādīmānā Rūh Apnāo**

Sab ke pānw dhone ke bād Īsā Masīh dubārā apnā libās pahnkār baiṭh gayā. Us ne farmāyā,

Kyā tum samajhte ho ki mainne tumhāre lie kyā kiyā hai? Tum mujhe ‘Ustād’ aur ‘Ḳhudāwand’ kahkar muḳhātib karte ho aur yih sahī hai, kyonki main yahī kuchh hūn. Main, tumhāre Ḳhudāwand aur ustād ne tumhāre pānw dhoe. Islie ab tumhārā farz bhī hai ki ek dūsre ke pānw dhoyā



karo. Mainne tum ko ek namūnā diyā hai tāki tum bhī wuhī karo jo mainne tumhāre sāth kiyā hai. Main tum ko sach batātā hūn ki ġhulām apne mālik se baṛā nahīn hotā, na paighambar apne bhejne wāle se. Agar tum yih jānte ho to is par amal bhī karo, phir hī tum mubāarak hoge.

(Yūhannā 13:12-17)

► *Shāgirdon kā kyā farz hai?*

Farz yih hai ki wuh ek dūsre ke pānw dhoyā karen.

► *Kyon?*

Islie ki un ke ustād aur Ḳhudāwand ne yih kām kiyā.

► *Kyā baṛon ke pānw dhone par zyādā dhyān denā chāhie?*

Nahīn. Sab barābar haiñ, chāhe baṛe hoñ yā chhoṭe.

► *Kyon?*

Kyonki ustād aur ẖhudāwand ne shāgirdon kī ẖhātir yih kām kiyā hai.

► *Ham kis tarah ek dūsre ke pānw dhote haiñ?*

Is se ki ham sab kī barābar ẖhidmat karte haiñ. Īsā Masīh yih taqāzā nahīn kartā ki ham uskī tarah apnī jān dekar dūsre ko pāk-sāf karen. Yih ham kar hī nahīn sakte. Lekin jab us ne hamāre lie najāt kā kām saranjām diyā to kyā hamēn us ke namūne par nahīn chalnā chāhie?

Sāth sāth Īsā Masīh ne ek wādā bhī kiyā,

Jo shaḡhs use qabūl kartā hai jise mainne bhejā hai wuh mujhe qabūl kartā hai. Aur jo mujhe qabūl kartā hai wuh use qabūl kartā hai jis ne mujhe bhejā hai. (Yūhannā 13:20)

► *Is wāde kā kyā matlab hai?*

Jo bhī Masīh ke nām meñ ātā hai use qabūl karnā hai. Jab ham use qabūl karte haiñ to ham Masīh ko aur us meñ ẖhudā bāp ko qabūl karte haiñ. Tab hī hamēn kasrat se barkat miltī

hai. Ek dūsre kī k̄hidmat karne se ham taqwiyat bhī pāte haiñ, wuh taqwiyat jis se ham shaitānī tāqatoñ se mahfūz rahte haiñ.

Āk̄hirī bāt jo Īsā Masīh hamēñ batānā chāhtā hai:

## **Shaitānī Tāqatoñ se Merī Hifāzat Qabūl**

### **Karo**

Ab Īsā Masīh muztarib hone lagā. Wuh bolā, “Main tum ko sach batātā hūñ ki tum men se ek mujhe dushman ke hawāle kar degā.”

► *Īsā Masīh ne yih kyōñ farmāyā? Agar yih honā hī thā to yih kahne se kyā farq partā thā?*

- Wuh chāhtā thā ki har ek apne āpko parkhe.
- Wuh Yahūdā ko taubā karne kā ek āk̄hirī mauqā denā chāhtā thā.

Shāgird uljhan men paṛ gae. Tab ek shāgird ne Īsā Masīh kī taraf sar jhukākar pūchhā, “K̄hudāwand, yih kaun hai?”

Īsā Masīh ne jawāb diyā, “Jise main roṭī kā luqmā shorbe men ḍubokar dūñ, wuhī hai.” Phir luqme ko ḍubokar us ne Yahūdāh Iskariyotī ko de diyā.

Jyon hī Yahūdāh ne yih luqmā le liyā Iblīs us meñ samā gayā. Ustād ne use batāyā, “Jo kuchh karnā hai wuh jaldī se kar le.” Dūsron ko mālūm na huā ki ustād ne yih kyon kahā. Lekin luqmā lete hī Yahūdāh bāhar nikal gayā. Rāt kā waqt thā.

► *Luqmā lene se ham Yahūdāh ke bāre meñ kyā sīkhte haiñ?*

Luqmā lene se Yahūdāh ne apnī ḡhalat rāh par chalne kā isrār kiyā. Masīh ne pāk-sāf ho jāne kī dāwat dī par Yahūdāh ne yih dāwat rad kī. Masīh ne Yahūdāh ko taubā karne kā ākhirī mauqā diyā par Yahūdāh ne inkār kiyā. Natīje meñ wuh Iblīs ke pūre qabze meñ ā gayā. Ab wuh Īsā Masīh kī hifāzat se nikalkar Iblīs ke rāj meñ ā gayā. Ab wāpas ānā nāmumkin ho gayā. Rāt kā waqt thā, aur Yahūdā ke dil meñ bhī andherā hī andherā thā.

► *Kyā āpko Īsā Masīh kī hifāzat hāsil hai?*

Pahle qabūl karo ki wuhī āpko pāk-sāf kar saktā hai. Hāñ, wuhī āpko rozānā pāk-sāf kar saktā hai.

Wuhī āpko k̄hidmat kī wuh rūh de saktā hai jis se sab par barkat barsegī. Aur wuhī āpkī shaitānī tāqaton se hifāzat kar saktā hai.

### **Injil, Yūhannā 13:1-30**

Fasah kī Īd ab shurū hone wālī thī. Īsā jāntā thā ki wuh waqt ā gayā hai ki mujhe is duniyā ko chhoṛkar bāp ke pās jānā hai. Go us ne hameshā duniyā meñ apne logoñ se muhabbat rakhī thī, lekin ab us ne āk̄hirī had tak un par apnī muhabbat kā izhār kiyā.

Phir shām kā khānā taiyār huā. Us waqt Iblīs Shamāūn Iskariyotī ke beṭe Yahūdāh ke dil meñ Īsā ko dushman ke hawāle karne kā irādā ḍāl chukā thā. Īsā jāntā thā ki bāp ne sab kuchh mere supurd kar diyā hai aur ki main Allāh meñ se nikal āyā aur ab us ke pās wāpas jā rahā hūñ. Chunāñche us ne dastark̄hān se uṭkar apnā libās utār diyā aur

kamr par tauliyā bāndh liyā. Phir wuh bāsan meñ pānī dālkar shāgirdoñ ke pānw dhone aur bandhe hue tauliyā se poñchhkar ḳhushk karne lagā. Jab Patras kī bārī āī to us ne kahā, “Ḳhudāwand, āp mere pānw dhonā chāhte haiñ?”

Īsā ne jawāb diyā, “Is waqt tū nahīñ samajhtā ki maiñ kyā kar rahā hūñ, lekin bād meñ yih terī samajh meñ ā jāegā.”

Patras ne etarāz kiyā, “Maiñ kabhī bhī āpko mere pānw dhone nahīñ dūngā!”

Īsā ne jawāb diyā, “Agar maiñ tujhe na dhoūñ to mere sāth terā koī hissā nahīñ hogā.”

Yih sunkar Patras ne kahā, “To phir Ḳhudāwand, na sirf mere pānwoñ balki mere hāthoñ aur sar ko bhī dhoen!”

Īsā ne jawāb diyā, “Jis shaḳhs ne nahā liyā hai use sirf apne pānwoñ ko dhone kī zarūrat hotī hai, kyonki wuh pūre taur par pāk-sāf hai. Tum pāk-sāf ho, lekin sab ke sab nahīñ.” (Īsā

ko mālūm thā ki kaun use dushman ke hawāle karegā. Islie us ne kahā ki sab ke sab pāk-sāf nahīn hai.)

Un sab ke pānw dhone ke bād Īsā dubārā apnā libās pahnkār baiṭh gayā. Us ne sawāl kiyā, “Kyā tum samajhte ho ki mainne tumhare lie kyā kiyā hai? Tum mujhe ‘Ustād’ aur ‘Ḳhudāwand’ kahkar muḳhātib karte ho aur yih sahī hai, kyonki main yahī kuchh hūn. Main, tumhare Ḳhudāwand aur ustād ne tumhare pānw dhoe. Islie ab tumharā farz bhī hai ki ek dūsre ke pānw dhoyā karo. Mainne tum ko ek namūnā diyā hai tāki tum bhī wuhī karo jo mainne tumhare sāth kiyā hai. Main tum ko sach batātā hūn ki ḡhulām apne mālik se barā nahīn hotā, na paighambar apne bhejne wāle se. Agar tum yih jānte ho to is par amal bhī karo, phir hī tum mubārak hōge. Main tum sab kī bāt nahīn kar rahā. Jinheñ mainne chun liyā hai unheñ main jāntā hoñ.

Lekin Kalām-e-Muqaddas kī is bāt kā pūrā honā zarūr hai, ‘Jo merī roṭī khātā hai us ne mujh par lāt uṭhāī hai.’ Main tum ko is se pahle ki wuh pesh āe yih abhī batā rahā hūn, tāki jab wuh pesh āe to tum īmān lāo ki main wuhī hūn. Main tum ko sach batātā hūn ki jo shaḡhs use qabūl kartā hai jise mainne bhejā hai wuh mujhe qabūl kartā hai. Aur jo mujhe qabūl kartā hai wuh use qabūl kartā hai jis ne mujhe bhejā hai.”

In alfāz ke bād Īsā nihāyat muztarib huā aur kahā, “Main tum ko sach batātā hūn ki tum meñ se ek mujhe dushman ke hawāle kar degā.”

Shāgird uljhan meñ ek dūsre ko dekhkar sochne lage ki Īsā kis kī bāt kar rahā hai. Ek shāgird jise Īsā pyār kartā thā us ke qarībtarīn baiṭhā thā. Patras ne use ishārā kiyā ki wuh us se dariyāft kare ki wuh kis kī bāt kar rahā hai.



Us shāgird ne Īsā kī taraf sar jhukākar pūchhā,  
“Ḳhudāwand, yih kaun hai?”

Īsā ne jawāb diyā, “Jise main roṭī kā luqmā shorbe meñ ḍubokar dūn, wuhī hai.” Phir luqme ko ḍubokar us ne Shamāūn Iskariyotī ke beṭe Yahūdāh ko de diyā. Jyon hī Yahūdāh ne yih luqmā le liyā Iblīs us meñ samā gayā. Īsā ne use batāyā, “Jo kuchh karnā hai wuh jaldī se kar le.” Lekin mez par baiṭhe logoñ meñ se kisī ko mālūm na huā ki Īsā ne yih kyon kahā. Bāz kā ḳhyāl thā ki chūnki Yahūdāh ḳhazānchī thā islie wuh use batā rahā hai ki Īd ke lie darkār chīzen ḳharīd le yā ḡharīboñ meñ kuchh taqsīm kar de.

Chunānche Īsā se yih luqmā lete hī Yahūdāh bāhar nikal gayā. Rāt kā waqt thā.